

Publication: Burger, DieSaturday (Wes-Kaap) (Sport)

Publication Date: 08 Apr 2017

Page: 16

AVE: 16540.22 Circulation: 54883 Part: 1 of 1

Tatjana blink uit vir plek in wêreldbad

Marizanne Kok

Die droogte in Suid-Afrikaanse vroueswem is uiteindelik verby.

Die 19-jarige Tatjana Schoenmaker het gisteraand in die Kingspark-swembad in Durban die eerste Suid-Afrikaanse vrou sedert 2014 geword wat vir 'n groot byeenkoms op die wêreldkalender gekwalifiseer het.

Schoenmaker, 'n student in finansiële wetenskap by Tuks, het in 2 minute en 25.23 sekondes in die tweede halfeindronde van die 200-borsslag op die nasionale byeenkoms seker gemaak dat sy vanjaar na die Wêreldkampioenskap in Budapest mag reis.

Die vereiste tyd is 2:25.91

Schoenmaker het die Olimpiese kwalifiseringsvereiste verlede jaar met 'n honderdste van 'n sekonde gemis, maar dié keer glad nie gesukkel om vinniger te gaan nie.

"Ek is so gelukkig, want nou het ek vir almal wat heeltvd vir ons vertel hoe dood die vroueswem is, gewys dinge gebeur. Ek het gekwalifiseer vir Buda-



Tatjana Schoenmaker gisteraand in aksie. Foto: GALLO IMAGES

pest en daar is 'n paar jong meisies wat hierdie week gewys het hulle moet dopgehou word. Ek is die oudste van die nuwe golf en ons is op pad," het Schoenmaker gesé.

Die groot ironie is dat Schoenmaker dalk nie in Budapest sal deelneem nie, maar eerder 'n paar weke later op die Wêreld-Studentespele sal swem.

"Die Wereldkampioenskap is reg in die middel van my eksamens en ek wil nie te veel tyd verloor by die universiteit nie, want my studies is ook belangrik. Ek het nog nie finaal besluit nie, maar ek leun al meer daarna om eerder na die Wéreldspele te gaan en in Desember op die Statebondspele-proewe seker te maak ek gaan Goudkus toe."

Schoenmaker was die sesde swemmer wat aan 'n A-kwalifiseringsvereiste voldoen het.

Cameron van der Burgh, Chad le Clos en Myles Brown het dit almal vroeg in die week gedoen, voordat Brad Tandy en Douglas Erasmus hul name gisteroggend in die 50-vryslag by die lys gevoeg het.

Tandy, wat verlede jaar op die Olimpiese Spele sesde was, het in die uitdunne 'n 22.07 geswem, en Erasmus het die vereiste (22.47) gehaal.

Tandy en Erasmus het later in die halfeindronde onderskeidelik 21.99 en 22.39 geswem. Zane Waddell (22.49) het in die aandsessie so byna ook die vereiste oortref.

Le Clos het self weer vir vuurwerk gesorg, toe hy die naasbeste tyd van 2017 ter wêreld in die 100-vlinderslag opgestel het.

"Die koning is terug!" het Le

Clos met 'n breë glimlag laat hoor nadat hy sy halfeindronde in 51.56 gewen het.

Dis nie net aansienlik vinniger as die kwalifiseringsvereiste van 52,29 nie, maar ook vinniger as wat Le Clos nog ooit so vroeg in 'n seisoen geswem het.

Net China se Li Zhuhao (51.34) was vanjaar al vinniger.

"Ek het alles gegee en niks teruggehou nie, want ek het gehoop vir 'n (tyd van) 52. So natuurlik is ek in die wolke oor dié tyd," het Le Clos gesê.

"Dis net 'n sekonde stadiger as my beste tyd ooit (sy Afrikarekord is 50.56) en anders as toe het ek nie geskeer nie.

"Dit wys net alles wat ons doen, werk.

"Ek is nog nie so lank by (sy nuwe afrigter) Andrea (di Nino) nie, maar ek kan voel my swemslag is meer effektief en bring beter resultate."

Le Clos sal vanaand sy byeenkoms afsluit in die eindronde van die 100-vryslag, maar hy het reeds al sy doelwitte vir die week behaal.



